



Inatsisartuni ilaasortaq Aqqa Samuelson, Inuit Ataqatigiit
/maani

Ilaasunik angallassinermi kiffartuussinermut isumaqatigiissutit pillugit § 37 naapertorlugu apeqquteqaammut 2019-100-mut akissut

Asasara Aqqa Samuelson

Inatsisartut suleriaasianni § 37 naapertorlugu apeqquteqaatinut nassiussannut qujanaq.
Apeqqutit matuma kinguliani ataasiakkaarlugit allanneqarput, akissummillu
malitseqarlutik.

- 1. Qeqertarsuup Tunuani kiffartuussinissamik isumaqatigiissutit 2021-imiit
atuuttussat nutarterneqassapput. Naalakkersuisut tamanna pillugu qanoq
pilarsaaruteqarnerlutik ilisimatitsissuteqarsinnaappat?**

Akissut: Maanna Disko Line-mut kiffartuussinissamut isumaqatigiissutit maanna atuuttut
tunngaviummik 31. decembari 2020-mi naasussaammata ilumoorpoq. Naalakkersuisut
isumaqatigiissusiassanut, isumaqatigiissutit maanna atuuttut naappata atuutilersussanut
piareersaatinik suliaqarput. Suliamut tassunga ilagitillugu 20. aamma 21. marsi 2019-imi
isumasioqatigiissitsinissamut Inatsisartuni ilaasortanik tamanik Naalakkersuisut
qaaqqusipput. Tassani ilaatigut siunissami kiffartuussinissamut isumaqatigiissutissat
oqallisigineqartussaapput.

- 2. Nunap immikkoortuini Qeqertarsuup Tunuani, Kitaani, Kujataanilu Disko
Linep kiffartuussinissamut isumaqatigiissummik ingerlatsinera pillugu
Naalakkersuisut qanoq nalilersorpaat?**

Akissut: Naalakkersuisut naliliinerat pingaarneq malillugu Disko Line-p pisussaaffiit
isumaqatigiissutigineqarsimasut naammassisimavai. Aamma Naalakkersuisut isumaat
malillugu sullissisut tamarmik kukkunernik amigaatinillu ilisimatinneqaraangamik
aaqqiiniartarsimapput.

- 3. Angallannikkut kiffartuussinissamik isumaqatigiissusiornissamut Disko
Line atorunnaarsinnissaanut imaluunniit allatut aaqqissuussinissamut
Naalakkersuisut pilarsaaruteqarpat?**

Akissut: Naalakkersuisut maannarpiaq kiffartuussinermut isumaqatigiissutissat
isumaqatigiissutigineqarnissaannut suliat inernissaat pillugit oqaaseqarsinnaangillat.

Ataatsimut isigalugu attaveqaatit pillugit isumasioqatigiinnissaq, siunissami
angallannikkut kissaatinik oqalliseqarfissatut kissaatigineqartoq
innersuussutigineqarpoq. Taanna tunngavigalugu Naalakkersuisut suliat ingerlanissaat
piareersassavaat, taamaalillunilu kissaatit pisariaqartitallu naliliinermi tunngaviummik,

sullissisunik toqqaanissamut tunngavigineqartussanut ilaatinneqassapput. Aamma siunissami aningaasaqarnermut sinaakkutissat kiffartuussinerup qaffasissusissaanik qanoq isikkulimmik naatsorsuutigisaqarsinnaanitsinnut aalajangiisuussapput.

4. Suna pissutigalugu S-61 innuttaasut angallanneqarnerannut atorunnaarsinneqarpa?

Akissut: Ilaasunut tunngaviusut, kiffartuussinermut isumaqatigiisummi aningaasaqarnermut sinaakkusiussat, bilitsit akii timmisartuussisarnerullu akulikissusia eqqarsaatigalugit atortut suliassanik naammassinninnissamut naleqqunnerpaat neqeroorutigissanerlugit sullissisup aalajangigassaraa. Naalackersuisut ilisimalerpaat sullissisunik ataasiinnarmilluunniit suliassamut qulimiguulik S-61 atorlugu sullissinissamik neqerooruteqarsimanngitsoq.

5. Suna pissutigalugu Qeqertarsuup Tunuani ukioq kaajallallugu timmisartumik qulimiguulimmik angallassineq atorunnaarsinneqarnersoq Naalackersuisut tunngavilersuisinnaappat?

Akissut: Aningaasaqarneq eqqarsaatigalugu ataatsimut isigissagaanni angallasseriaatsip ataasiinnaap atorneqarnissaa naleqqunnerpaassaaq, tassani pisinnaasanik atorluanaanissaq sapinngisamik annertunerpaassamat tikittartullu akulikinnerussammata, ajornanngippallu sapinngisamik eqaatsumik tamanna ingerlanneqarsinnaassamat. Tamannarpiaq Qeqertarsuup Tunuani anguniarneqarpoq, aasaanerani imaatigut angallanneq kisimi atorneqarluni.

6. Nunatta sineriaani S-61 innuttaasut angalanerannut assartuutitut atuleqqissinnaaneranut Naalackersuisut pilersaaruteqarpat?

Akissut: Apeqqut 4-mut akissut takuuk.

7. Nunatsinni avatangiisimut pinngortitamullu imaannaanngissinnaasumut timmisartut qulimiguullit suut naleqqunnerunersut misissuiffiqineqarsimanerluni?

Akissut: Apeqqut 4-mut akissut takuuk. Tassunga ilanngullugu oqaatigineqassaaq, Naalackersuisut manna sullissisunik sullissilersinnaasunillu oqaloqateqartarnermikkut atortut assigiinngitsut atorlugit periarfissat killilersuutillu pillugit paasissutissanik naleqarluartunik pissarsisarmata. Pinngortitamut, anorimut, silamut taartumilu pissutsinut isumaliutersuuterpiaat oqaloqatiginnermut ilaatinneqarput, taamatullu qulimiguulinnut mittarfiit angissusiisa tikikkuminassusiisalu killeqarneri ilaatinneqarlutik.

a. Nunatsinni avatangiisimut pinngortitamullu imaannaanngissinnaasumut timmisartumik qulimiguulimmik nutaamik pisisoqassappat tamanna Nunatta karsianut aningaasanngorlugu qanoq naleqassava?

Akissut: Naalackersuisut tamatumunnga atatillugu aningaasartuutissarpiaat aalajangersimasumik oqaatigisinnaanngilaat. Tamatumani qulimiguullit suut, sullissisunit

neqeroorutigineqarsinnaanersut, minnerunngitsumillu tamatumunnga aningaasartuutissat apeqqutaasorujussuusissaapput. Ataatsimut isigalugu oqaatigineqarsinnaavoq, kiffartuussinermut isumaqatigiissutit atuuffiisa sivirususissaat akiilu sullissisut atortunik nutaanik neqerooruteqarnissamut kajumissusiinut apeqqutaasorujussuummata. Tassunga ilanngullugu oqaatigineqassaaq, angallassinermi suliassani tamani atortunik nutaanerusunik atuisoqassappat, tamatuma bilitsit akiinut aamma/imaluunniit kiffartuussinermut isumaqatigiissutinut aningaasartuutit qaffangaatsiarnerinik, taamatullu qulimiguulinnik annerusunik atuisoqassappat sanaartornermut aningaasartuutit qaffangaatsiarsinnaanerinik kinguneqarnissaa Naalakkersuisunit naatsorsuutigineqarmat.

8. Suna pissutigalugu Sarfaq Ittuk Kangaatsiamut Qasigiannuanullu tikissaarnersoq Naalakkersuisut tunngavilersuisinnaappat?

Akissut: Qasigiannugit Kangaatsiallu imaatigut angallammik angallassinermik neqerooruteqarfigineqarsinnaaneri pillugit Naalakkersuisut Arctic Umiaq Line ingerlaavartumik oqaloqatigaat. Maanna pissutsit atuutsillugit tamanna periarfissaqanngilaq, taamatut imaatigut angallassinissaq umiarsuup angalanissamut pilersaarutaanut allanut ornigassallu allat sullinneqarnerinut naleqqussarneqarsinnaanngimmat.

9. Suna pissutigalugu Sarfaq Ittuk taamaallaat ukiakkut Qeqertarsuarmut tikittalernersoq Naalakkersuisut tunngavilersuisinnaappat?

Akissut: Qeqertarsuup angallavigineqarnissaa ukiaanerani qaammatini, Qeqertarsuup eqqaani silap pissusaata ajornakusoornerpaaffigisaani periarfissanut ilaavoq. Naalakkersuisut siusinnerusukkut piffissani angalaffiusuni allani Qeqertarsuup ornigassalluunniit allat angallavigineqarsinnaaneri misissuiffigisimagaluarpaat, kisiannili Arctic Umiaq Line-mit ilisimatitsissutigineqarpoq, pingaartumik aasap qaammataani angalanissanut pilersaarutit nalinginnaasut 100 %-imik atorneqartartut. Taamaattumik piffissaq angalaffiusoq sivitsorneqarsinnaanngitsaq imaluunniit ornigassat amerlineqarsinnaanngitsut naliliisoqarpoq.

10. Sarfaq Ittuk Qeqertarsuup Tunuani illoqarfinnut tamanut ataavartumik aqqusaartalernissaanut Naalakkersuisut pilersaaruteqarpat?

Akissut: Naagga, maannaanngitsaq. Apeqqut 8-mut akissut takuuk.

11. Umiarsuit sinersortaatit amerlinissaanut Naalakkersuisut pilersaaruteqarpat?

Akissut: Naagga, maannaanngitsaq. Umiarsuarmik sinersortaammik allamik atuilernissaq pillugu kiffartuussinermut isumaqatigiissusiornissaq aningaasartuuterpassuarnik nassataqassasoq naliliisoqarpoq.

12. Umiarsuit sinersortaatit amerlineqassappata Nunatta karsianut aningaasanngorlugu qanoq naleqassava?

Akissut: § 37 naapertorlugu apeqquteqaammi 2019-034 apeqqut 1-imut akissuteqaat innersuussutigerusuppara.

13. Qeqertarsuup Tunuani angallannikkut pissutsit pitsanngorsaaviginiarlugit Naalakkersuisut qanoq pilersaaruteqarpat?

Akissut: 20. aamma 21. marsi 2019 attaveqaatit pillugit isumasioqatigiittoqartussaavoq, tassungalu Inatsisartuni ilaasortat tamarmik qaaqquneqarput. Tassani siunissami kiffartuussinermut isumaqatigiissutissanut kissaatit pisariaqartitallu oqaluuserineqassapput.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga


Karl Frederik Danielsen